

頤道堂詩選

頤道堂詩選卷十三

錢塘 陳文述 退庵

古今體詩

題顧亭林先生像

一代遺民錄千秋王佐才
管寧浮海去伏勝授經來
忠孝平生志滄桑故國哀
卽今圖畫裏冰雪仰風裁

書北嵐所輯明左忠貞公遺集並題古刺水讀史容

燕三詩墨蹟後

公諱懋第字仲及號蘿石登州萊陽人早喪父事
母至孝崇禎辛未進士官韓城令流賊來犯擊走
之擢戶部給事中有直聲遷刑科出察江防未復

命而都城破福王立升太僕卿改僉都御史巡撫
應安會母喪乞守制而朝議遣大臣使北營山陵
竝議割地歲幣公自請北行因得葬母升兵部侍
郎經理河北齋國書金幣往以陳洪範馬紹愉副
公以曾劾紹愉不當復與共事竝乞去經理但銜
命往不從至燕館於鴻臚寺請祭告諸陵及改葬
先帝皆不許陳太牢於旅所哭奠之勸降不從遣
歸至滄州追還改館太醫院聞南都失守慟哭不
食七日以丙戌六月十二日至柴市南面再拜端
坐殉節是日風沙忽起一時罷市從行兵部司務
陳用極遊擊王一斌都司張良佐劉統王廷佐僕

左夏王聯洲皆從死公死後都門有諸生曹某者
素有狂名人莫與之語聞公變撫而哭之歸嚮得
百金爲殮具徒步扶輓歸萊陽葬蘿石山公父墓
側宏範至滄州請赴江南招劉澤清等先行紹愉

降

萊陽左公天人流浩氣丹心亘胸臆生平大節美忠孝後
世遺文光簡冊公昔讀書九龍社文采聲華追混籍一從
作令入秦中左臂巖疆古馮翊寇恂河內原知兵虀詡朝
歌能治賊孤城斗大作保障太華龍門資阨塞至尊下詔
求直言四歷諫垣期稱職南察江防籌饟運西定左軍安
反側十六年左良玉軍剽掠荆襄朝銜命未復國變生河

議舉公往參軍政公單騎往論

岳崩頽日月蝕南都重建望中興北使請行期報國王曾
富弼才本裕朱弁洪皓行尤亟請謁山陵事可哀請葬帝
后心更盡兼之哭母淚漬麻無異從戎經加墨聚來金縉
括草莽歷盡關河走荆棘倘令和議仿遼宋或者中分限
南北豈知天意判興廢枉遣忠臣細心力初從張灣閉空
舍更向滄州阻車軾慟哭寢廟薺麥青望祭昌平雲樹黑
鴻臚寺中血灑地太醫院中身而壁慷慨原師蘇子卿公
韓城修蘇子卿墓及困苦還同謝枋得七日泥塗甘受困
在燕懸子卿像於壁八月艱難恆絕食艾傅勸降真齷齪中軍艾大選傅濬謂
濬以通山東危京師去變捕王劉從難皆正直生爲忠臣
公下獄置公惡水中七日死忠鬼今古綱常此身植天地爲公色慘澹風雲爲公氣

淒惻千秋祇有宋文山孤忠一樣甘埋碧燕市狂生舊酒
徒力將齒髮歸窀穸何年遺集出人間鬼神呵護忠魂魄

荆溪大令公桑梓蒐輯鴻文待鐫刻搜來別傳有姜陳

左司

馬傳陳用濟撰左
侍郎傳姜琛撰

卽論斯文亦韓白蘿石山前墓草枯梅

花屋畔寒香逼

蘿石山公父墓因以自號
梅花屋在韓城詩集名

長篇鉅製皆葬

鼎斷楮零縑亦圭璧昨從清閱讀遺詩紙墨如新殊可識
正是燕京待命時一甌古刺悲王澤家山陵樹感客燕涕
灑青函增太息寒窗急雨共吟嘯疑有商聲和潮汐東海
泱泱起大風萬古丹青照顏色

忠貞集中有蘇武墓司馬遷墓兩詩皆公令韓城日

修墓所作敬爲和之

昔聞懷古賦溫岐甲帳丁年絕妙詞但識節旄凋北地豈
知墓柏鬱南枝玉關燕頰生同入青冢蛾眉死不移從古
詩人重忠節天山不弔李陵碑

右蘇武墓在韓城西北五里蘇山墓柏數百株皆南向

漢家太史有遺墳芝水南流片石蹲冤憤當年下蠶室文

章此地有龍門同州環佩埋殘碣

謂隨清娛

韓土河山弔古魂

未必蘭臺能勝爾史家宗派溯昆侖

右司馬遷墓在韓城東二十里芝水南

贈畢孝廉華珍兼呈鐵雲樊邨

騏驥無凡毛鸞鶴無凡羽孝廉名公孫才筆橫今古在昔
尚書公於君爲伯祖丹忱事純廟海內幾開府陶鑄盡
英傑勛業總文武君祖貴介弟博學趙歐侶雅集王晉卿

文謙張功甫法書與名畫鈐印重璜琥尊甫湛經史箋注
兼訓詁書校劉更生經拜臧榮緒君才尤出羣矯矯若龍
虎銳意爲詩文所師在韓愈奇光五色石勁筆萬鈞弩頻
年客京輦鴻詞作雲雨禮邸頗好賢緇衣慰羈旅歸臥婁
江濱盛年感出處示我百首詩墨瀆污殘楮方寸山嶽峻
杳冥鬼神腐似生元和間昌黎相晤語吾友舒孝廉奇文
若峭巖金石相考擊鸞鳳互歌舞前輩高逵夫盛名洪玉
父新聲播梨園齊名被菊部黃河遠上詞同向旗亭賭更
有蕭明經絕業冠鬢序於君爲中表於我久賓主念君不
去懷關愛在心膺譽君不去口淵源詡門戶君從吳苑遊
宿我蘭臺聚讀君五言詩感激深肺腑 國朝二百年人

物僅可數名輩甚不乏各自出機杼方今海內才各有五
雜組元音孰琴瑟雅奏孰鐘鼓東家鄭康成北海孔文舉
此席吾豈敢此論竊所取願君德更崇吾亦力同努君其
競齊秦吾亦守鄒魯勿逐齊梁靡勿數陰何苦言詮落小
家何異誚童殺他日丁敬禮定文吾待汝

和作

錢塘陳雲伯大令丈枉詩走筆奉答竝呈令子孟楷

茂才

太倉 畢華珍 子筠

昔有善說詩曾不工詩章意者非語言此詣久茫茫生
人習死法聞之令腐腸探喉偶得之豈以一家長陳侯
譽我詩投章滿琳瑯吳郡夙多彥況我敢頡頏以此歸

閉戶坐臥三尺牀讀書盡數卷窮海天低昂作者既已

夥鬱鼎但一嘗豈如肝肺灼自作冰玉光三江一衣帶

浮沉兩相忘未嗤言詞拙撲筆歌慨慷心想碧城詩謂所

著碧城仙館詩集翩若朱霞翔七文爛綺貝纚纚織女襄又如

咸謏奏鐘鼓溢四廂邇來愈刊削立論掃粃糠搜揚人

物志感激春陵行風雅卽諫牘奈何意不償少期蘭臺

聚十年莅吾鄉雞鳴統如鼓所至投傳忙何能但坐嘯

上官忌材良曩我下第歸始識江夏黃己巳歲余遊京師歸初識孟楷

於吳門時方從吾邑蕭子山丈受經年未冠也末路已大成把卷神揚揚復據

長史坐高談助衝觴力排八道攻氣叶九鐘霜吾儕火

色騰杞梓扶明堂出身自不免抑已道斯臧金谷等聚

蚊道路羣飛鶴斯言久吾病謂如中風狂平生所遇歷
事與浮雲量閣筆不辭訶蹉跎折齒剛而況積薪勢後
來蔚相望旁觀頗異尙山水慕錢塘昔訪葛洪井春風
芝朮香未厭餐玉法且書肘後方斯言不知裁爲寄水
仙王

汪公子均之食唐荔於福州怡山寺中填荔支香詞
寄示索和書四絕句報之

一曲新詞詠荔紅霓裳往事說唐宮驪山明月華清水都
入張王樂府中

夷光構李空吳苑瀛國黃柑入宋詞爭似怡山山下樹曾
經天寶太平時

長安宮殿冷啼鴉飛騎紅塵感夢華更憶金輪皇帝事一

株神木牡丹花

神木縣相傳有武后時牡丹

萬里關河走舳艫玉盤珍重進瑤除漢家禮竝櫻桃薦不用唐羌更上書

吳門女郎蓮因誦余碧城仙館詩書此以贈

自家甘苦自家知弔夢歌離一卷詩已分江湖生白髮漫勞闈閣寫烏絲本無姓氏傳中禁莫信聲華替左司尙有十年新詠在待君評泊其然脂

曾騎匹馬古長城曾向泥金嶽頂行我以無聊成薄宦爾因何事識浮名三生桃葉纏懸意一曲梅花倡和情太息臨川湯若士恐將衰朽誤媼姪

春夜木蘭堂聽師禹門刺史談海州雲臺山之勝雲

臺山古郁州山也作郁州山詩

郁州之山仙所宮北江之北東海東其高千仞深百重四
圍突兀環羣峯上有開闢以前之靈藥下有隨刊以後之
長松就中最勝數東磊巨石層疊疑天工飛流直下石梁
瀑伏蟄欲起龍湫龍其下大海水萬里一碧摩青銅鷹遊
雙疊峙屏障明鏡翠掃蛾眉濃山石面面削絕壁如砦如
屋如高墉櫻桃高下一千樹花開爛熳朝霞烘有時海氣
暗巖谷白雲靜與苔花封此山傳自蒼梧向東徙南方草
木春蒙茸都州鬱林屢紀異覆金東溘將母同雲臺之名
始明季三元宮殿開靈蹤道家之說半荒邈頗似訪道銘

崆峒山麓民戶昔二萬山田上下安春農國初禁海畫海
外內徒往往驚傳烽越十六載復著籍恬風息浪開艤臙
百餘年來氣象變沙岸無復春壽衝往日仙山風雨阻今
茲神路魚鹽通乃知桑田滄海說非妄坐見壺嶠成衡嵩
君來作牧今幾載循聲不讓渤海翼政成多暇事文獻更
續唐志登民風我昔于役過沂沐鶴聲夜響秋雲空連宵
剪燭話清宴春月澹白春燈紅長歌走筆用相報夢遊城
闕尋芙蓉搜奇倘刻郁州帖題名崖石應先礪

觀山吳梅邨墓下作

靈巖山下萬株梅畱得詩人土一坏屈子離騷多古怨香
山樂府是仙才當時老輩如君少後世相知有我來讀到

殘碑數行字落花惆悵拂青苔

元夕聽雨

一冬無雪復無雨龜坼紛紛裂田土父老憂旱甚憂澇尙
悸前年蘊隆苦麥苗短短菜甲枯汲灌艱難話農圃河渠
半涸潮不上萬斛糧艘滯江汭畚鍤勞人竟何益真使隨
何不能武今夕何夕春燈明兒女團圓夜三五頗疑月妒
避雨師黯黯重陰暮庭戶竟夜潏潏響不止綠波定見生
遙浦須知天意愛蒼生何嘗感召由官府好乘陽氣布春
和莫但祈年仗田祖

吳門朱綬沈傳桂王嘉祿吳嘉淦韋光黻彭蘊章潘
曾沂諸君年未及三十而詩文皆卓然可傳是可

喜也作七子詩

歸愚老去宗風墜又見吳中七子才伯仲之間見何李文
章餘事亦鄒枚大名各爲千秋計生面誰將一代開領袖
從來賴英絕翦燈吟罷重徘徊

二月初三日大雪書事

前日儼若盛夏之酷暑今日忽若嚴冬之奇寒三日之中
氣候異兼有雪花如翼飛漫漫雪花漫漫復噫噫昨夕未
雪先以雷雷鳴號號聲未震或者盲風勢太橫今日雨雪
聲沙沙先集維霰開冰花霰中兼雹雹大作風勢挾之聲
震屋徹裘典後勁骨支更憶萬家兒女無寒衣因思一冬
無雪亦無雨蔬圃麥畦裂乾土春雪味苦壞麥根似爾祥

雲亦何補江湖不上官河枯河干鱗集阻舳艫但解損麥
不濟運風雷雨雪空載塗我思水者厚地之血脈兩者上
天之膏澤淫氣致沴亢致旱或者陰陽待調變銅坑山中
千樹梅春風連夜應吹開不然零落依蒼苔我作此詩無
可寄天外飛鴻知此意

二月四日雪中招同吳蘭雪舍人蕭樊邨明經小集
桂葉書堂

酒邊回首話長安更與新知結古歡日下舊遊前輩少雪
中小集草堂寒名場驥老長征苦宦海鷗閒久立難莫笑
故人大憔悴吳中七子有詩壇

聽蘭雪話重修吳采鸞寫韻軒事卽用題壁詩韻

青山歸去月明秋往事人傳跨虎遊美女簪花兩粉木繡
襦甲帳遲靈修倘教書罷同攜手定有仙家說竝頭今日
鸞岡誰作記曲闌干外大江流

原作

吳嵩梁

繡襦甲帳不勝秋騎虎西山汗漫遊塵海偶然成小謫
仙家從古愛雙修簪花天上誰彤管偕隱人間幾白頭
一席願分安硯地寒閨賣畫亦風流

書蘭雪廬山武夷紀遊詩後卽送歸東鄉

我讀太白廬山謠屏風九疊凌斗杓銀河倒挂爐峯遙我
讀紫陽武夷吟武夷九曲深復深幔亭仙樂不可尋昨夜
清遊託仙夢夢裏遊仙玉琴弄一卷新詩碧雲重舍人雅

結遊山綠燕臺曾誦西山篇月華月氣仙乎仙

蘭雪遊翠微山句月

華有露亦有霜月氣非煙亦非水

仙之人兮石齒齒足底芒屨半雲水廬

山高高武夷深詩境清蒼亦如此仙掌厓畔秋月明石門

澗底春雲生雛姬采蘭抱逸氣玉女畫竹畱秋聲

君遊武夷姬人

婉如與偕又將鑄姬人綠春畫竹於廬山楞伽院

我昔北遊登岱頂封禪臺高白

雲冷出塞遠過烏灤河青石梁高踏松影賦詩盈帙聲

牙但有嘔強無清華爭似君詩得奇趣尺峯寸澗皆煙霞

讀君廬山詩思作廬山遊武夷之深不可求欲往從之路

阻修名場宦海雙浮鷗落筆各自矜千秋願君遲發西江

舟

題家湘南女史

景垣

吟香閣詩草

班姬鮑妹總能文知爾才華敵左芬匣裏珠光爭月豔卷
中花氣得蘭薰舊家王謝悲簪笏故里沅湘隔水雲今日
碧雞天萬里靈修遲暮最憐君

過開元寺觀西晉建興中海浮石佛像竝登甄閣觀
明萬曆中所頒藏經

晨熹晃殿脊風雨滋庭翠遠潮赤烏年肇建白馬寺懿封
崇燕國家牒漏吳志更聞典午朝中逮建興歲遙聞海潮
音遠達滙瀆溼來此石佛像背刻梵書字維衛吾不知迦
葉事略記如來大弟子問思參覺義巍巍雞足山遠在蜀
徼地示現應有時花雨鬢雲麗石鉢先後出七佛表靈異
殿後藏經閣瓊甌築初地前明神廟中經廠慈寧置菩薩

九蓮經說倣託夢寐江陵宰相業於此殊可議奄人虛造
多流傳雜真偽遂令奸駑徒煽惑無所忌流毒百年後螫
人甚蠍虺白蓮與紅陽支派若譜系不見前年秋遂有滑
臺事蘭池雖小醜象已動星彗往歲零丁帖疑衆祖前智
根株搜未盡實心在良吏我生廿年中事已見三四所幸
元氣豐瘡痍未爲累文武互張弛堯舜病施濟經正庶民
興雲日仰光被三復原道文慨然思古義

花朝前一日同蕭樊邨及兒子孟楷過獅吼庵爲鐵
雲設奠竝贈庵僧道懷

生平交誼感青琴一慟相看淚滿襟破屋殘書孤子淚素
筍濁酒故人心庭階寂寞畱殘雪鐘磬淒涼結暮陰擬易

庵名作瓶水百年詩卷託禪林

余以獅吼二字不佳擬以瓶水二字易之瓶水鐵雲

齋名

春夜建威將軍宅聽燕姬邊月華琵琶彈白翎雀歌

春月白照紅梅花坐聞邊女彈琵琶琵琶急雪花落滿
耳商聲白翎雀白翎雀非凡才本是塞北種何年遠向江
南來江南處處芳草綠白翎高飛恣飲啄自言受命于鳳
皇鳳皇回回隔紫閭鸞乃鳳之族鶴亦鸞之友鴻雁雲中
翱鸞鸞波上走白翎去燕雀寧白翎至風雲生前飛鶴鷗
後欽鴉餓鴟銜鼠鴟雛驚蒼鷹側目不敢擊擊之不勝尤
驕鳴白翎汝有聲頗亦中宮徵汝有好毛羽亦與雪霜似
如何一意矜飛翔蒼鷗沙鴉紛成行一鷗冷眼煙波涼可

憐白翎雀自言受命于鳳皇白翎雀誰所作十五么姬花
綽約國手無雙弄弦索江南稻梁已不多何不飛去他處
樂願君蹇止勿再彈月影已上紅闌干

書侯朝宗壯悔堂集後

東林望重世爭投復社才高衆所尤青史從來悲黨禍虛
名何事競清流將軍跋扈空無敵

謂左良玉

兒女悲歡有莫愁

何似東塘新樂府後庭花唱隔江秋

謂桃花扇

吳郡署木蘭堂相傳爲陸魯望賦詩之地丙子二月

中和日廢堂郡伯補植二樹以復舊觀並書補蘭

二字以顏其額因系以詩

木蘭堂上春陰暮陸郎當日題詩處詩人去後一千年花

枝開落銷春煙春光爛漫花枝盛昔年長慶今嘉慶使君
愛花同愛人萬家雨露滋芳春君是香山吾魯望昨夜船
頭聽春浪兩株玉樹交琳琅琴尊東閣環花光他年遺愛
平江路木蘭花卽甘棠樹

廢堂郡伯旣補種木蘭於聽事復於東園植雜花木
余與北嵐諸君朝夕從事於此擬各種花一樹以
誌蹤蹟以枚數之余得綠萼梅北嵐得桂艾鐵崖
得海棠李子謙別駕得碧桃萬浣筠得紅梅葛嘯
巖得杏子謙方攝太湖司馬浣筠嘯巖于役雲間
詩以紀事並寄之

十載江南稱傲吏辛苦栽花無寸地名花屢向思園看紛

紛香影紅闌干使君鶴警尋詩處新種庭前木蘭樹種樹
更種園中花花光滿眼酣紅霞我輩年來數晨夕各種花
枝記鴻雪使君種蘭我種梅滿枝香雪橫蒼苔瘦骨冰心
有高格恰近天然一品石小山叢桂仙源桃海棠嬌坼紅
杏苞諸君種花各有意仙雲如海香如潮昨夜濛濛春雨
細天爲養花破成例扁舟旦晚荷鋤來好趁春波催鼓枻
二月十四日兒子孟楷招集吳下諸詩人與婁東畢

孝廉集余桂葉書堂用東野招文士飲詩韻

中歲惜白日少年愛春華庭戀未消雪樹矜先著花三吳
佳麗地歌舞沿浮夸科名亦世榮逝水同歎嗟諸子應列
宿珠斗森橫斜刻苦爲詩文立志爭名家屈意友我子羣

鶴偕孤鴉肝膈厲冰雪氣誼交雲霞願各抱冬心浩歌吾
無涯

船戶歎

前年河水枯舊年河水凍今年春雨少柔櫓灑菱葑帆檣
鱗次排河埂衛丁作勢橫索錢糧艘載貨兼載米米多起
剝須民船官符捉船教捉空胥吏捉船先捉重重船空船
一例捉閒泊河干仍不用有錢空船亦不停無錢重船亦
不行估客坐愁船婦歎眼看畫舫春波明年來衛丁猛如
虎索費無窮窘官府縣官爲公兼爲私腹削無非小民苦
衛丁苦官實苦民丁應日富民日貧傳聞苦累因北壩百
年民隱誰與陳大編峩峩在河渚羈累無端到行旅櫂艘

暢行或放汝私祝河流漲春雨

巢雲閣望虞山

夕陽紅影下平川青入虞山一點煙天際斷霞飛鳥外鏡
中空翠畫闌前蕊宮花史迷仙夢流水琴河憶玉絃何處
蘼蕪弔香冢第三橋外尙湖船

虎邱二姜先生祠題壁

全家同死國兄弟此專祠拜杖前朝烈遺文後世悲風雲
趨北極花月鬱南枝祔祀休輕議沉吟第二碑

玉蘭曲贈歌者陸玉蘭兼感隴西公子塞外

玉蘭花發春風香玉蘭花謝春雲涼蘭芳玉潤花解語一
樹亭亭豔春雨河東公子隴西豪解賦燕蘭譜玉簫清歌

屢得周郎顧，壓倒長安花。萬樹綠章誰付，小心風吹散。雙
鴛一夢空，春光不度渾河水。從此玉關人，萬里腸斷斑駁。
送陸郎吳宮結束，又登場尊前，哀唱銅弦急。應憶桃花馬
前雪，回首燕臺隔暮雲。金張門第，黯生塵，不堪重唱西樓
月。我識龍沙塞外人。

舟過寶帶橋望太湖山色

寶帶橋橫太湖口，萬峯青翠隨人走。歷數橋洞五十三，一
一明鏡開塵函。青山如眉復如黛，深淺鏡中各有態。一鏡
纔收一鏡開，文君絳仙先後來。又如倪黃妙筆分流派，幅
幅林巒都入畫。水立雲飛志靈怪，青天眞作虛堂挂。我聞
太湖三萬六千頃，洞庭七十有二峯。峯峯芙蓉峯，峯峯松倒

影湖底蒼煙濃縹緲林屋吾未到夢聽石姥語石公堦鄉
聞在莫釐下山莊杳靄煙雲中此是東南之巨浸六郡灌
輸若汾沁吳淞白茆久湮塞蓄洩之宜誰所任我今放棹
來吳江盡收清氣歸篷窗船頭吹蓬影山渡江南山水真
無雙

後兩生行答朱西生

緩

沈閨生

傳桂

見贈之作並東

吳清如

嘉祐

王井叔

嘉祿

潘春泉

曾沂

稽仙根

蓬

椿

鐵雲昔作兩生行我今得讀兩生詩兩生詩才各雄健生
縛虎豹蟠蛟螭贈我詩篇得古意謬許壇坫替左司吳中
論詩溯沈約三唐衍派分宗支禮堂七子重江左功名文

朱煥鼎彝風流闐寂五十載滄浪古水環荒祠兩生嗜古
入肝膈風騷漢魏力所追同時健者數吳質古文大筆何
淋漓王生磊落名父子樗隱一老世所師潘迪門第最華
貴玉立照耀珣玕琪褚生之才託仙鬼幽花泣露揚芳蕤
集我小齋晨會食坐聆玉屑忘朝飢伏鸞隱鶴互吟嘯瑤
林玉樹紛扶持韋莊彭修未得見碧雲日暮心遲遲我生
學詩二十載流派久被高才嗤我家衮師若駒犢天驥乃
與相驅馳從來文章貴有本菑畬經訓培根基立身各自
有千古不在浮譽誇文辭和平集福謙受益珠韜玉斂含
光輝諸君華年正鼎鼎冬心勿逐春華移錢王著述有遺
軌處爲名世出羽儀學道有得願相勗書之座右銘箴規

雨中思園小憩

掃除塵垢敞虛堂池上松風響畫廊
皴石苔痕翠微色亞
枝花氣白雲香紅闌干外春陰重銀燭光中暮雨長爲有
新栽幾行樹角弓賦罷賦甘棠

新種梅樹著花甚繁因書四絕

小影何人似分明萼綠華不知身是客借地種梅花
疎影何條然暗香更幽絕移取一枝春猶帶銅坑雪
幾點蒼苔落殘香入素琴偶然弄春色切莫負冬心
瘦勁爭奇格高寒見逸才此時香雪海應有幾株開

病中頗有所悟偶書六首卽寄松壺

年來久已息飛騰定裏分明見佛燈
回首空山坐秋樹前

身原是壑庵僧

小豹嬌憨孔雀仙
蒼狻馴擾鶴翩翩
三生石上曾相識
更伴清遊四十年

十載長安歎轉蓬
半生江表感疎慵
何年歸臥僧廬下
飽聽南屏寺裏鐘

蘭陔侍膳步花林
繙到楞嚴日未沉
滿地松陰滿池水
在家無異出家心

百年名輩半凋零
招隱淮南賦未成
祇有松壺老居士
肯來聯榻聽松聲

夢中恒與松壺對臥僧寮

山水方滋見逸才
半生殘夢入天台
看雲聽瀑無窮事
更向深山采藥來

夢中所見寤後賦之

夜色橫千里秋聲落九臬仙心眞浩蕩煙路與遊遨素月

雲間樹歸風海上壽古巢松頂在樓隱其蓬蒿

老素鶴也

老臥南山下深藏積歲年獨歔深洞月來證遠公禪骨肉

三生石英雄再世緣荒庵風雪夜憶爾伴高眠

小豹虎也

鐘外聽經去煙中獻果來攀藤幽澗下嘯樹白雲開翠落

中峯瀑青橫太古苔空山間采藥期爾入天台

蒼猿二一黑一白

不圖閒寂地有爾孔家禽金翠皆仙氣蘭茗亦道心來從

青嶂遠去入翠微深欲問他生事還從繞剎尋

孔雀

夢中詠西湖六柱船

煙雨湖天暗畫紗江南羈客未還家曉風殘月無人夜閒

泛微波載落花

病中無以自娛檢各家詩集玩之分題卷端

吳澹川南野堂集

垂老仍爲客談詩更論兵高歌唐將相平揖漢公卿學圃
心原古安禪夢亦清南湖煙水闊華屋感生平

邵夢餘蕉雪詩鈔

一卷殘詩在東陵感故侯青山秣陵曉微雨鏡湖秋寥落
名場驥浮沉宦海鷗臥龍山下路宿草已荒邱

錢謝庵齋心草堂詩

武林錢吏部詩格窅然深似入空山裏微聞太古音空林
澄道氣流水澹禪心一棹西溪雪梅花應滿林

舒鐵雲瓶水齋詩

孤抱眞名士高懷古逸民
中年感行役晚歲戀衰親
死孝悲除夕從軍話戰塵
憶從蕭寺過酌酒弔殘春

查梅史菽原堂集

霞明天淨處積翠共參差
君向宣城去能爲小謝詩
林泉間有致山水意方滋
何日歸漁浦空舫和竹枝

蕭子山樊邨草堂集

樊邨吾老友才力最稱雄
長慶無餘子元和有古風
經生重江表詩派衍婁東
壇坵齊名處吾應遜此翁

錢叔美松壺畫齋

我愛松壺子西冷此逸才
煙霄一聲鶴花海萬株
梅關塞

中年感江湖晚歲哀壑庵棲隱處頭白早歸來

子婦汪端自然好學齋集

清絕湖山氣都歸筆一枝應分古人席不作女郎詩至性
重親歎心齋古佛知殷勤語吾女賢孝汝當師

讀明督師閣部史忠正公集書後

我讀武侯出師表王業偏安心未了我讀文山正氣歌輝
燭日月撐山河嗟哉前明史督師生當地老天荒時虞淵
已沉白日暗海宇崩裂無綱維翊戴靈武正位號丹忱夾
輔天王旗恭皇之子烈皇弟南都擁戴禮所宜中外一心
藩鎮協恢復可望中興基豈料枕戈臥薪事春燈燕子同
兒嬉馬阮鬼蜮事傾軋高劉桀鰲尋瘡痕門戶殘局及宗

社天心已去人心移左兵東下淮戍撤王師飛渡環軍塵
廣陵孤城恃保障大厦一木力豈支城破被執全節死天
地慘澹風雲悲 聖朝寬大古未有禮臣議諡兼專祠家
書畫像侍郎進

彭元瑞

天語褒寵題新詩郵置廣陵泐祠

壁昭昭白日長在茲萬古丹心燭遺集親自裔孫德純輯
公之嗣子史德威親奉衣冠埋碧血集中奏疏二十三至
今血淚沉湘函當時天牖孱主聽或者半壁支東南春秋
大義皇靈仗答睿王書尤慨慷 天語親題在卷端 純
皇大度真無兩公死之日母在堂遺書血淚悲淋淚從來
忠孝難兩盡盡忠卽孝關綱常其他文字皆在卷筆底蛟
螭起雷電身殲志決盡此中英靈如見宗臣面同時大節

推左公

調忠貞公愬第

奉命北使聲望隆子卿持節死不屈與公

一例稱精忠奉使當時渡江去維揚應是經行處近來遺

集出人間萊陽後學親刊誤擬建崇祠仿蜀岡海東州將

思籌箸梅花嶺卽梅花鳴爲公廣種梅花樹

趙大令曾左忠貞公同里

輯公遺集將付梓師刺史兆龍擬於梅花嶺下更建左公祠刺史韓城人左公嘗令韓城故也

積雨兼旬夜不成寐頗憶丙辰年轉餉河上經月奔

走雨中亦在春夏之交意有感觸爲書此詩

竟夕潺潺玉漏知空林應識曉煙遲偶因風雨懷人夜卻

憶關山轉餉時歷歷舊遊寒入夢蕭蕭華髮鬢添絲綠陰

如暝春如水倚枕沉吟感舊詩

雨中餞春

屐聲清遠識鄰家屋瓦淋漓澀曉鴉春盡餘寒如潑水雨
中小別有殘花犁鉏寂寞愁茆屋蠶麥蕭條感歲華最憶
西湖新漲好六橋煙水泛輕艇

聞道

聞道江東事年年角兩雄野人話牛象詞客感雞蟲春浪
無邊白斜陽有限紅我來高閣上一笑海天空

病中攬鏡

壯心羞對鏡況是病中看自覺須眉古天憐骨相寒親年
通夢寐世味雜悲歡面目從新認前生是嬾殘

送玉壺山人遊洞庭西山

君去遊林屋應登縹緲峯溪煙春後碧嵐翠雨前濃我欲

移舟去閒情病後慵山程勞記取他日訪遊蹤

病起見新綠

小庭新綠已如潮桐葉成陰柳帶飄隔著疎簾玩清影一
春花事此中消

載酒江湖事有之茶煙輕颺鬢成絲年來已醒樊川夢在
爾成陰子滿枝

幾生彌勒許同龕學到安心睡定酣一角南屏山下路綠
陰如水有茆庵

以詩乞椒畦畫壑庵招隱圖

門前橫碧水屋後見青山筇杖梅花外蒲團松樹間偶邀
猿共宿閒待鶴飛還恐有浮雲過終朝靜掩關

喜松壺子見過

畫筆王摩詰詩情孟浩然古人如可作之子定稱賢寥落
久爲客蕭疎已入禪他年壑庵畔期爾對林眠

鵲啼曲

婁東蕭百堂鵲啼曲序云北平馮聖世以事至嶺
南過南雄宿旅店壁間有詩云金能買妾誰爲侑
流毒蛾眉直至今賤等青衣遭妒辱瘦同黃葉又
霜侵魂消枕上鵲啼夢膽落尊前獅吼音一自崑
崙翻案後更無豪傑具婆心自臨春水喚卿卿千
古傷心療妒羨伊有詩詞畱斷簡我餘衾影弔寒
檠朝飛血淚梅花赤夜數苔斑蝶夢驚薄命小青

原一派可憐無地覓倉庚末云妾姑蘇薛印江女也賣身江右逐宦嶺南偶值歸途漫吟哀怨因粉壁畱數行之血或英雄生一綫之憐破壁有期銜環無盡事載馮所著雜記偶於友人齋中翻故帙見而哀之賦鶉啼曲以記其事余於令弟樊邨案頭見此作因繼聲焉

夢回薜荔煙淚溼桃柳雨紙上起秋聲如聽鶉啼苦鶉啼復鶉啼章江日又西前程趙王苑故里白公隄七里山塘路飛燕單棲處薛曲傷橫塘門前烏柏樹何物是黃金能移阿母心吳雲千疊遠嶺樹萬重深鶉鶉長比翼鴛鴦亦作匹底事泣青衣么弦彈錦瑟覆水本難收江波日夜流

鷓聲啼不住殘月下西樓

苦雨書悶

空階積雨勒餘寒擁被沉吟伏枕歎燕子聲從愁裏聽
牡丹花向病中看應知新漲生遙浦定有苔痕上曲闌
我爲春收念蠶麥農家心事正艱難

許菊船刺史旋自桂林見過話舊有懷令弟仲容大
令蜀中

我又三年住君仍五嶺還春風吳苑樹秋月桂林山宦海
波初定浮生夢未閒偶談邊塞事樽酒動離顏

有弟官西蜀軍諮萬里行玉關曾絕塞青海又從征朝議
原持重 皇仁在息兵安邊有長策切莫競功名

時麻爾喀與鄰

部冷楞構兵乞師未允表辭不遜 上命將
軍賽冲阿統師至藏觀變大令同在軍中

獨遊滄浪亭懷蘇子美次首弔沈歸愚尙書

濯纓芳渚問如何啼鳥聲幽指薜蘿繞屋綠陰皆老樹當
門碧水有微波放懷風月園林古失意文章涕淚多咫尺
雲庵遺趾在茶煙粥鼓未消磨

暮年遭際說東陽海內詩名最擅場洛社應追邵康節鑑
湖曾賜賀知章生前高詠華林重死後殘碑墓草荒畱得
選樓三冊在月明清嘯和滄浪

小齋坐雨

積雨潤林木密蔭森高柯新桐雜疎柳翠色紛女蘿今雨
續舊雨繁聲鳴枯荷檐溜響秋瀑庭潦迴盤渦虛堂若深

谷愁霖感滂沱因憶湖上山衆綠生澗適南屏蘊積黛西
湖涵明波廿年縛塵鞅俯仰餘悲歌幾番託歸夢移家傷
巖阿行理耦耕具否或尋漁簑

薄暮雨勢未已

晨雨聲潺潺暮雨聲瀟瀟頹雲壓重檐勢欲連深宵東菑
懷田家綠漲低邨橋二麥應已穫計日分青苗插秧水已
足婦子欣忘勞因憶甲戌夏赤日烈且驕四月至九月河
涸田疇焦至今尙心悸流亡歌董逃鷺飛煙漠漠魚上波
迢迢三復雲漢詩何如甘澤謠

雨中過滄浪亭

滄浪之水清可以濯我纓滄浪之水濁可以濯我足清濁

兩不辨一雨生衆綠衆綠出高林綠波涵綠陰我來池水
上閒發滄浪吟綠陰美如此綠波靜若彼鳥啼濃翠中魚
行深碧裏亭上不逢人寂寞滄浪水

周忠介公祠

茄花滿地有根菱拂袖南歸已禍胎清議肯容張讓在黨
魁爭哭范滂來輕身就獄忠臣事血疏排閭孝子哀我在
麗娃鄉畔住薦蘋蘋見古祠開

郡齋東園池上草堂話雨

孤花媚殘紅積雨靄盛綠我從池上來坐見池水足應知
昨夜雷檐溜響飛瀑深洞納溼雲蒼秀儼林麓虛堂盡愔
愔清陰暗雲木喬柯榦孤勁嘉植陰清淑主人培養深潤

澤快新沐問俗隘南畝翻犁健黃犢插秧貴及時秋成望
嘉穀三復靈霖詩閒閒澹心曲

蓉裳農部下世將經歲矣令子浣菴自蜀扶柩南還
相見吳下話舊感賦

龍蛇厄運竟何如太息黃公舊酒壚舒雅已亡燕客少張
衡告逝蜀才無舒謂鐵雲張謂解山豈期霖雨懷孫楚又見流星隕

謝敷應有草堂遺橐在迢迢雲棧泣啼烏

長慶新篇屬老成盈川才調最縱橫萬言倚馬傾前輩一
席龍門啓後生今日王盧誰竝駕當年元白媿齊名不堪
重作春明夢珠斗闌干憶鳳城

石峯小醜肆披猖積雪長圍困伏羌不是孤城障天水難

禁曠騎阻甘涼劉琨清嘯千笳月李益高吟萬馬霜更有

燕然勒銘者季方才略似元方

謂令弟荔棠方伯

聽君蹤蹟起長歎清淚沾衣感百端萬里河湟畱戰壘十年京洛領騷壇琴尊東閣荷衣舊風雪西華葛帔寒嗟我浮沉似萍梗名場宦海總漫漫

月夜舟泊黃花湮遇雨

溼雲翳月不可尋片玉忽墮蒼松林清光一綫破雲出照見兩岸秋蟲吟蟲聲如咽復如語似與羈人相爾汝月波破碎萬珠跳忽有奇雲送飛雨

雨聲驟卷飛瀑來長風驅雲雲不開滿船俱作漏天漏僮奴夢破驚喧電光照船雷響疾知有屯雲蝕明月須臾

風止雨亦停依舊林端看月出

桐橋行

吳人燕玉懷賈於楚娶東湖馮氏女甚佚麗歸而
不容於大婦燕爲賃居桐橋婦絕其往來先是女
之婚也父早卒其姑之夫王某者博士弟子也初
以爲所生妾於燕旣又利燕多金爲退券託以他
辭送女歸楚而不使知次年女偕母及弟至吳門
期復合燕制於內不敢畱訟於官勿能決予惡婦
之妒而尤鄙王之無賴也作此詩

馮氏有佚女家住東湖邊東湖在何處縹緲巫山煙女顏
嬌如花女心皎如玉花氣靜含芳玉質堅抱璞蘭蕙託松

柏兔絲施女蘿根蒂抱幽石枝葉蟠高柯白首本難終紅
顏偏易誤無端下水船相送吳閶路花月滿山塘虛家白
玉堂月華憶彭蠡花夢落瀟湘小姑本無郎使君自有婦
不詠周南詩但聽河東吼賃廡倚桐橋梧桐倚鳳條望郎
郎不見一日兩回潮拋擲鷓鴣裘碎裂鴛鴦瓦數行決絕
詞阿翁親手寫破鏡不重圓覆水難再收浮雲南北逝溝
水東西流自惜雁奴寒敢言鴆媒惡不怨郎情變祇憐妾
命薄妾已甘獨處郎豈負初心孤生合歡樹單棲竝命禽
妾身不再嫁妾顏空自美獨照玩清冷一片桐橋水

夾浦橋夜泊風雷雨電竟夜

我來夾浦橋遙望吳江雨雨勢未到先有雷雷聲破雲雲

不開壞雲壓天走飛電照見天南白一片雨腳下注勢向
東白雲蓬蓬知有風須臾風至雨亦至戰鼓昆陽塵萬騎
疑有蛟龍欲上天竟恐江湖欲浮地昨日過滄壁前日過
望亭官河積水已平岸低田半沒青苗青太湖蓄水久已
足黃浦洩水苦不速吳淞未開白茆塞雨多深恐淹穉
電掣金蛇雷疊鼓孤坐蓬窗滌煩暑送我華胥一枕酣夢
回曉色催漁櫂

吳江曉起

舟臥忘清曉漁榔警客眠啼鳥涼破夢榔樹靜生煙殘雨
吳江郭孤帆震澤船太湖三萬頃一碧定橫天

趙北嵐

會

百漢碑齋觀嵩山三石闕銘拓本用琅嬛

仙館集中嵩山三石闕歌韻

嵩高嶽配朱鳥低勢埒東岱臨青齊三闕離立開有足霍
南恆北泰華西陽城太室實中嶽氣盤林壑回巖溪外方
大熊互脈絡瑇瑁蓄草忻羣黎少室峙西太室竝曾獲駁
廡如犛犀帝休敷華潤靈澤玉膏溢谷融春漸啓母文字
更奇古石亦剝落顏色顰塗山候人本荒誕豈有厲狐爲
聖妻朱寵呂營共建造空同欲指襄城迷此闕閱今二千
祀文亦典重曰若稽君言乙亥夏四月還轅涉洛尋山蹊
親攜推甍拓紙墨絕磴蘿石勞攀躋仙禽搗藥響深谷人
言夜半問天雞百漢碑齋富金石寶此無異璧與圭琅嬛
謁此禱雪釋三闕各有新銘題何年聯軫訪汝頴隱居同

聽寒猿啼

盧鴻一張彪种放
隱居皆在嵩山

嵩山三石闕歌

阮元

嵩岳三闕同高低左右離立八尺齊啓母一闕距其北

太室峙東少室西誰其建者漢朱

龍

呂營

誰其書者皆

堂谿

漢潁川
堂谿典

篆隸詰屈銘句奧請降雲雨生蒸黎畫圖

月兔木連理駕車乘馬鉤象犀閱魏太武周久視夏暴

烈日冬流澌二千年來屹相向脈質纒剝厥色黧二室

神祠始秦漢產啓已說塗山妻要之陽城本禹地三塗

四載應無迷此闕雲祇久呵護歐趙訪古何未稽褚峻

縮本我早見茲來車馬尋荒蹊闕間頗足容二軌壁墨

未可窮攀躋周魯雉闕制可見雉度以綉非以羅

古城闕之

雉乃度以雉也雉乃鷄同音假借字鷄繩也申生雉
經以鷄自經也自古未有見雉鳥自經者舊說非
雉拓取筆墨黝寶之無異摹元圭更洗奉堂卽秦室額

東石一行刻字名留題神君興雲闕中起廟牆漢柏春
鳩啼

秋夜待月寄樊邨婁東

前夜坐待月夜靜人亦閒月華若流水演漾庭戶間繡此
雪色壁樹影殊闌珊中夜不忍寐微聲發幽蘭昨夕君已
去去去婁江灣草堂樊邨上竹樹森檀欒團團桂之樹秋
氣馥可攀翦燈話離緒玩此雙雲鬢今夕月上遲珠斗橫
闌干清輝疑戀君爲君照玉顏夜闌莫久坐半臂生微寒
寄詩待新雁海上橫青山

樂蓮裳孝廉卒於廣陵詩以哭之

龍虬餘氣入今年玉樹凋霜一泣然落魄煙花詩世界銷
魂冰雪夢因緣水仙祠畔瀟瀟雨金姆橋邊去去船回首
萊蕪灣口月罪言誰更似樊川

英吉利歌示使臣米士德

英吉利爾國安在去中國 大皇帝所治中隔十萬餘里
大瀛海英吉利爾何所能製鐘表辨刻漏能織呢羽爲
毳毼英吉利爾何所見大郎山頭看南斗嬰武羣飛綠成
片英吉利爾來何意海西小島如蜉蝣傾心皈依 大皇
帝 皇帝萬歲萬萬歲兵力能伏汝大度不貪汝土地汝
顧隸典屬國萬國玃珍有成例 純皇在御癸丑春爾國

入貢羅奇珍不貴異物不勤遠任爾化外爲藩臣英吉利
爾誠傾心皈依 大皇帝表文宜合格使臣宜習禮任土
作貢毋自異寵賚便蕃酬汝意 皇帝萬歲萬萬歲歲書
入貢英吉利

郡齋東園桂樹一株是北嵐大令手植深秋獨未著
花距大令之逝匝月矣感而賦之

小山叢桂樹親見故人栽春雨曾分潤秋花忍獨開微陰
消綠葉涼露泣蒼苔枯樹蘭成賦沉吟感八哀

戴貞石參軍畫廬山瀑布障子書寄蘭雪舍人

戴君贈我廬山圖中有西江千尺水一樓遙對香爐峯中
隔雲煙三百里太白昔作廬山遊屏風九疊芙蓉秋崖迴

嶂杳石梁滑銀河倒挂飛龍湫九十九峯雲外路有人聽
瀑吟秋去黃巖絕頂看雲生探源更入雲生處君未入山
曾見山寫此尺幅虛堂間昨夜海上急風雨夢遊疑向天
池還生平山水抱奇癖澗樹巖花契泉石何年同訪讀書
堂期爾彈琴嘯秋碧

草堂聽雨有懷

草堂深夜雨點滴盡秋聲落葉空階下西風一夕生殘鐘
吳苑樹新雁廣陵城知爾江南夢躊躇其此情

池上草堂見落葉有感北風大令之亡

欄外西風一夕生蕭蕭殘葉下無聲荒池水澗填將滿臥
石苔深襯漸平別院陰隨諸吏散虛廊響逐故人行分明

十載閒吟地老樹啼鴉總愴情

八月十四夜聽雨憶芹兒闌中

亦知故鄉雨同此響闌珊矮屋警新漏棘闌生峭寒佛名
誰鑄定官燭定燒殘望汝歸期近重親待致歡

登舟

出郭見黃葉已知秋氣深城隅環古路水曲澹空林驛樹
吳橋轉窳煙陸墓沉來朝滄海上萬里碧雲陰

舟中見月初出

遠郭秋煙暗空江夜色明疎星隨棹起圓月對船生尊酒
前番路明燈昨夜情雲帆掛滄海應不媿平生

玉峯道中玩月寄湘姬

玉鏡掛船頭明霞送舵樓晚山濃入畫遠水澹生秋憶昨
雲間去曾偕月下遊今宵孤枕夢寂寞在扁舟

對月寄樊邨婁東

有約看明月今宵悵未能草堂君濁酒客舫我孤燈遠閣
靜橫笛疎星冷掛罾知君池水上一樣露華澄

深夜見月

深夜見涼月客心同此閒況當風露下相望水雲間吳苑
無多路婁江第幾灣徘徊不成寐秋夢落空山

招樊邨同舟劉河道中玩月作

林靜風聲歇潮平月影圓近邨遲上火遠水細生煙一夕
同舟話三生借榻眠浮蹤似萍梗小聚亦因緣

劉河張氏寓樓題壁憶丁卯春于役海上信宿此間
今十稔矣書示逆旅主人

棲燕尋陳蹟啼鳥識舊聲
檐端看葉脫窗外見潮生
燈火三生夢煙波萬里程
回頭十年事華髮不勝情

將渡海之前日致祭碧霞元君祠下作

渤澥浮槎第幾回
瓣香又拜古祠來
千花香樹金燈出
萬里瀛波玉鏡開
宦海升沉原有數
清時舟楫媿非才
雲帆浩渺王程急
願乞靈風著意催

劉河天后宮通蕃事蹟石刻歌和樊邨

石在劉家港天后宮壁
明宣德六年正使太監鄭和副使太監朱良都指揮朱珍等立辭載永樂三

年統舟師往古里等國時海寇陳祖義等聚眾三
佛齊國鈔掠番商生擒厥魁至五年回還永樂五
年統舟師往瓜哇古里柯枝暹羅等國國王各以
方物珍禽獻貢至七年回還永樂七年統舟師道
經錫蘭山國王亞烈若奈兒負固謀加害賴神顯
應得備遂生擒其王至九年歸獻尋蒙宥歸國永
樂十二年統舟師往忽魯謨斯等國有蘇門答刺
國僞王蘇幹刺寇侵王遣使赴闕請救就率兵勦
生擒僞王至十三年歸獻是年滿叻加國王率妻
子朝貢永樂十五年統舟師往西域忽魯謨斯國
進獅子金錢豹西馬阿丹國進麒麟番名祖刺法

并長角馬哈獸木骨都東國進花福祿并獅子十
刺哇國進千里駱駝并駝雞瓜哇國古里國進糜
里羔獸方物皆前古未聞王各遣男弟捧金葉表
文朝貢永樂十九年統舟師遣忽魯謨斯等各國
使臣久侍京師者悉還本國各國王貢獻視前益
加宣德五年仍往諸蕃開詔舟師泊祠下思昔皆
神明護助勒文於石

大瀛如鏡磨青銅海氣一碧蟠靈宮穹碑屹然立祠壁大
書深刻前朝功靖難師入宮殿火片月影墮江湖中窮搜
遠出八荒外戈船萬斛驅艤艫蒲類將軍奮艘艘濛汜都
督森戈鏜中涓握節坐玉帳師干所指恬魚龍歷十四載

師六出經十二國宣皇風錫蘭蘇門咸戡定滿加阿丹皆
來同珍禽奇獸充內苑表文金葉光熊熊駝雞羔獸花福
祿宜圖王會陪巴賓宣德五載復奉使萬國成就中朝封
立石祠下頌功德想見效順神燈紅我思內豎職灑掃此
輩詎可親兵戎恭顯竟死肅太傅魚仇幾危郭令公漢唐
往事足殷鑒讀史往往悲塵蒙開國家法本厲禁鐵牌設
立宮門東如何漏師反銘德遂以授鉞資酬庸兩帝兆讖
陷法駕委鬼流毒悲諸忠履霜堅冰事有漸得不歸咎祖
若宗矧復贖武至絕域竟欲遠挂扶桑弓方今海宇慶清
晏梯航祇許來吳淞內臣衣食有定制宮史所載漢道隆
摩挲片碣重懷古極目萬里滄溟空

寓樓月夜聞笛書寄蘭姬

歸潮東下欲無聲，華月盈盈接檻生。
海上何人閒擲筵，樓頭憶爾靜吹笙。
新涼翠袖中宵怨，香霧雲鬟獨客情。
解話相思慰岑寂，此行深悔未攜卿。

劉河老人行

劉河老人頭似雪，家住劉河渡邊宅。
眼見繁華感盛衰，僕指從頭向人說。
在昔劉河全盛時，千櫓萬艦泊河麋。
粵閩舶趁朝朝達，遼海雲帆處處馳。
大道高樓連數里，翠館紅樓夾河起。
千家寶貨溢金錢，比戶笙歌豔羅綺。
轉眼無多四十春，行看東海復揚塵。
幾家少婦變成姬，幾家華屋摧爲薪。
天道不常人事改，商舶紛紛歸上海。
吳淞空闊黃浦

深聞道繁華增幾倍上海日富劉河貧謀生辛苦劉河民
前年官府浚河道依舊堙塞無舟楫沙脊橫長作河背可
惜劉河竟如此富家已賣劉河田貧家但飲劉河水我語
老人休自悲盛衰倚伏皆如斯劉河開通始元代朱張往
事無人知明初通海無他處六國馬頭稱要路中涓偵諜
總師十萬樓船從此去 國朝柔遠有深仁呂宋暹羅
不知數東海船收乍浦津西洋帆指香山樹我曾期月令
上洋客民畱寓多披猖陸博劇飲兼好鬪隱憂誰與爲隄
防縱有官軍猛於虎爭禁胥吏貪如羊劉河煙水雖寂寞
庸知寂寞非爲福古來逐未致豪富亦似春潮消長速農
桑本務能絲延女勤紡織男耕田但宜清宴樂今日莫更

豪華羨昔年

登舟祭海神作

雲帆浩蕩出東津，祭罷天妃祭海神。
但覺乾坤浮溟洞，久知檣艣靜風塵。
三沙煙樹農邨遠，十激旌旗戍壘新。
媿乏昌黎碑頌手，祇憑清白答明禋。

劉河阻風書示僮僕

莫羨來船是順風，須知身世有窮通。
因緣夜雨闌珊裏，消息秋潮長落中。
何樹能生無患子，此身久學信天翁。
衣裯隣爾同單薄，海色吹寒上短篷。

阻風三日書寄樊邨

晚潮挾雨魚同上，老樹搖風鵲不鳴。
悔未畱君三日住，小

窗聯榻聽秋聲

掛帆示舵工施瑞

長檣業業拂雲高，艤牒分明駕六鰲。
爾以輕便狎風浪，我憑忠信涉波濤。
浮生閱歷心多感，宦海蒼茫首獨搔。
細認鍼盤牢把舵，莫辭辛苦莫辭勞。

渡海二首

殘月別高樓，疎星送客舟。
碧雲千里合，白露一天秋。
齒老名場驥，心閒宦海鷗。
前程何處是，一髮古瀛洲。

一出劉河口，茫茫水接天。
但憑帆作路，不信海無邊。
望眼浮雲沒，當空皎日懸。
施翹河上泊，回首十年前。

臧少府署齋觀邵夢餘大令遺詩感賦

大有銷魂語無非絕妙詞紗籠冷官壁殘墨故人詩花月
三生石江湖兩鬢絲臥龍山下路宿草不勝悲

月中至壽安寺禮佛書寄家人

流年彈指一微塵來向瞿曇證夙因玉局修書前世事碧
城選夢散花人名場落落空當世宦海茫茫寄此身明月
海天獨惆悵未將樽酒獻雙親

乘月登寺後金鰲山觀白蓮池水月

林月光玲瓏古路入幽靜池月意澹沲流紋散清迴我從
深夜中來此人外境荇藻澹浮空竹柏細流影不知山月
幽何如水月靚澄潭息風漪華雲共清景蛩聲涼更咽鷗
夢酣未醒一靜萬緣寂一間衆妙領吳苑成故鄉幾處殘

燈耿豈知不眠人寂寞隔滄溟感舊問虛廊露下蒼苔冷

沙人

沙人只合種沙田又見秋成到木棉門外家家掃晴雪斜
陽滿樹曬花天

趙都督

春曉

招飲軍門聽談李壯烈伯

長庚

海上用

兵事

戰鼓銅魚鑰樓船珠虎牌相逢趙充國能說李臨淮虬鳥
千艘合魚龍八陣排於今慶清宴燈火話衙齋

月夜聞雁聲書寄舍弟謙谷

海色夜涼初月華臨廣除樓臺千里遠燈火一窗虛我作
懷人詠方緘寄弟書雲端呷征雁聽爾倍躊躇

秋日登崇明城樓眺望

城郭濤聲裏樓臺盛氣中曾經兵火劫依舊海天空軍府
遙相對樓船望不窮閒吟覽清宴沙岸夕陽紅

燈下檢海上舊詩是戊辰年湘姬手錄書以寄之

浣花箋紙暈燕支曾見簪毫寫我詩今日又來滄海上相
思況是晚秋時蟲聲咽壁燈來早雁影流天月到遲知爾
妝臺同此意墨痕狼藉滿烏絲

月夜聞紡織聲

漏聲寂寂夜閒閒織婦千家杼軸艱誰寫瀛洲好風景月

華如水屋三間

仲鶴
慶句

茆檐辛苦劬難支繡閣嬌愁定不知多少吳姬厭羅縠綠

窗一樣夜眠遲

銀漢斜臨海上城
露團庭綠夜涼生
豆花籬落秋如水
處西風絡緯聲

爲沈忠節公建祠書事

公名廷揚明崇禎諸生以海運事思陵官光祿卿
南都破從監國至海上加兵部侍郎舟至鹿苑遇
颶舟膠被執完節金陵子元泰並部下諸將及所
部六百人皆同殉乾隆中賜諡忠節余戊辰春
至崇明曾作書海運疏後古詩一章今攝篆此邦
訪其祠宇未建乃爲設祀於學宮之西舊書院址
也以從死及貞節諸人附焉旣作祠堂碑結銜議

耐祀記諸文以紀之復成四律以待邦人和焉

當平桑海有孤忠思挽虞淵日再中卜式毀家原不忝平

陵報國竟無功祇今里閭猶華望

邑中沈氏皆稱忠烈世家

終古滄波

有大風記得行春過鹿苑暮雲無際碧天空

鹿苑在常熟境余嘗治地

第一功名海運書風雲萬里護儲胥激昂江表談兵日

東豪士沈茂之遇於山塘以海運書五卷贈公辛苦津門轉餉初自昔神倉資積

貯卽今漲水滯河渠當年我亦紆籌策空有浮名儼子虛

庚午春余應海運上書大府不納

詔讓

偶然鴻蹟印平沙來訪東陽處士家但有姓名談父老

邑人

稱爲五梅公五梅公別字也

曾無祠宇闕煙霞粉榆東郭招歸鶴松柏

南枝鬱暮鴉擬酌清尊歌小海海天風雨正傳芭

况聞遺墓近山塘卽在要離古冢旁

公墓在山塘五人墓西馬營弄北久爲居

民所佔後裔等曾鳴諸元和尹

謚議久勞秦博士碑文未勒蔡中郎

全謝山太

史集中有公神道碑文

桂林畱守祠猶在

羅忠宣公式相祠在常熟招真治

蒼水尙

書碣未荒

張忠烈公煌言墓在西湖南屏山下

更擬爲公乞防護褒忠

丹

詔頌

純皇

和作

吳江

顧我樂

正叔

詔從勝國錄遺忠

褒卹全歸

睿鑒中橫海有軍資

殉節膠舟無路與成功時艱枉灑孤臣淚事往爭談烈

士風羸得崇祠借血食相看被髮下長空

後裔猶存轉漕書昔年曾借付鈔胥因知黑水揚帆處

何異瓊山建議初

明邱文莊公曾論海運可行

海若于今長息浪宣

房况復屢疏渠紆籌莫笑前人拙概等談兵紙上虛

軍儲辛苦濟量沙淮右歸來已被家旋向虞淵扶落日

早蒙史相乞

去

飛霞

閣部史忠正公命公回崇糾集水師

湖山無分畱泥

馬宮苑徒憐噪晚鴉埋骨恰當乾淨土

公墓在山塘五人墓西本普惠

寺舊基

應羞封築待侯芭

漢侯芭爲楊子雲起墳

使君來自古錢塘築舍何須議道旁差喜建祠鄰學署

還思題柱繼仙郎迎神好薦蘋蘩潔種樹休教檜柏荒

從此銜

恩徧存歿長畱碑版鎮堂皇

送趙都督至吳淞有懷楊良淵節鎮

君去吳淞口吳淞我舊遊濤聲春石岸帆影掛城樓夜月

江灣曉西風海樹秋因君憶楊僕歸去臥扁舟

重九偕顧廣文黃孝廉祝署丞金鰲山登高適喬五
秀才自上海來同與斯遊作詩記之并寄舍弟

人生若飛鳥棲止忽如寄四十六重陽今秋來海澨賓朋
三四人招邀入古寺喬生海上來舊雨快把臂鰲峯雖匪
高登覽亦快意秋色洗清曠海宇映澄霽遠闕露明燼紅
樹夕陽麗新雁橫清秋暎離念吾弟炊煙暖遠林暮色蒼
然至佳詠寄蕭晨落葉送歸騎

又寄舍弟一首

君在吳門奉老親我從海上詠蕭晨屬君莫更登高望多
恐高堂憶遠人

寓齋玩月

入戶對華燭出戶玩華月華燭照形影華月冷肌骨醉裏
憶朱顏夢中感白髮此間乏臺榭亦無好林樾日夕海風
生中夜曾未歇開門見東海未夕月已出清景不成眠坐
待殘星沒何處長笛聲遙情自馨逸

願正叔廣文齋中見菊

重陽纔見菊況在別家看朝露泣秋色西風生暮寒茱萸
同把玩苜蓿共闌干正有思歸興東籬夢未闌

同喬五秀才登城西鎮海樓玩月

明月出東海光照城西樓樓上何所見曙色凝清秋中夜
不成寐散步成佳遊金風蕭槭銀漢路阻修我家西湖
西青山好林邱君家淞水上臺榭涵清幽清遠但一氣慨

然生古愁焉知滄海上此間古瀛洲軍府夜吹角遠憶橫
海舟仰視北斗旁耿耿橫牽牛三復碧雲詩高詠懷湯休
九月十四夜寓齋玩月書懷

醉看白露下征衣回首高堂定省稀明月又從東海出孤
帆思趁北風歸雙魚消息更番憶旅雁江湖獨自飛猶是
重陽好風景菊花爛熳蟹螯肥

將歸吳門畱別送者

小住瀛洲又兩旬雪泥蹤蹟悟微塵一祠香火償前願兩
袖清風謝故人別酒不辭花笑客寄書應望雁來賓賞心
更有三芝瑞期爾瀛洲占好春

是秋城上生三芝
同秋賦雋者三人

林靜潮平圓月在水微風夏之蕩漾變化不可名狀

詩以寫之

一角冰輪雲外起湛湛玉盤沉水底水花蕩漾生微風浪花開出銀芙蓉須臾風定波未定一波一暈一明鏡或爲疊璧或聯珠一片空明悟心性因思天上月卽是水中影水中月自動天上月自靜靜中有動生兩儀動復歸靜參元機此理非仙亦非佛萬古青天一明月

劉河道中陸行書寄樊邨

路經古岸平橋外秋在荒坵敗葦間昨日宦遊愁渡海今朝歸路近看山黃花節序賓朋散紅樹邨莊父老閒便擬約君吳下去楞伽霽色待同攀

樊邨送余水仙祠下書此爲別

一葉扁舟送落霞
婁江秋水碧無瑕
屬君記取吳塘別
滿樹斜陽幾點鴉

舟中玩月

月出水雲間
波平夜放船
天空初下露
林靜欲無煙
瀛館懷前夕
江城夢隔年
來宵吳苑望
期爾十分圓

婁門道中曉望

婁江迢遞達吳江
送我歸舟櫂一雙
枕上推蓬望清曉
一林紅葉在船窗